



CONCELLO DE CABANAS (A CORUÑA)

ACTA DA SESIÓN EXTRAORDINARIA DO PLENO DA CORPORACIÓN, REALIZADA O 11 DE OUTUBRO DE 2019

Alcalde-Presidente:

D. Carlos Ladra Brage

Concelleiros/as;

Dª. Concepción Rodríguez Ferreiro (Gr.Socialista)
Dª. Diana Mª. Rodríguez Fernández(Gr.Socialista)
D. Iago Varela Martínez (Gr. BNG)
Dª. Paula González Grueiro (Gr. BNG)
Dª. María Eva García Amor (AEC-Gr.Mixto)
Dª. Elena María Arias Martínez (Gr.Popular)
Dª. María José Bouza Varela (Gr. Popular)
D. Manuel González López (Gr. Popular)
D. Javier Fernández Brage (Gr. Popular)
D. Xosé Manuel Pérez Sardiña (EM-Gr.Mixto)

Secretaria-Interventora accidental:

Dª. Susana Fernández Muiño

No salón de sesions da Casa do Concello de Cabanas, sendo as nove horas do día once de outubro de dous mil dezanove, reúnense en primeira convocatoria, baixo a presidencia do Sr. Alcalde don, Carlos Ladra Brage, os señores/as concelleiros/as que se relacionan á marxe, ao obxecto de realizar sesión extraordinaria do Pleno da Corporación, coa asistencia da Secretaria-Interventora accidental, dona Susana Fernández Muiño, que da fe do acto.

Unha vez comprobada a existencia de quórum para a válida constitución do Pleno, o Sr. Presidente declara aberta e pública a sesión, e procédese a tratar os asuntos incluídos na Orde do Día:

1. Moción para a adopción urgente de medidas que salven o futuro da central térmica de As Pontes, presentada polo Grupo Popular.

O Sr. Alcalde, Ladra Brage, dá a palabra á Secretaria-Interventora accidental, que expón a documentación incluída no asunto a tratar na Orde do Día do Pleno extraordinario:

Con rexistro de entrada nº 2019-E-RC-2771, de data 30 de setembro de 2019, o Grupo Municipal do Partido Popular presenta escrito no que, ao abeiro do establecido no artigo 78.2 do Regulamento de Organización, Funcionamento e Réxime Xurídico das Entidades Locais, solicita a convocatoria urgente dun Pleno extraordinario cunha Orde do Día na que se inclúa o seguinte punto: Moción para a adopción urgente de medidas que salven o futuro da central térmica de As Pontes.

Visto o establecido no artigo 46.2.a) da Lei 7/85, de 2 de abril, Reguladora das Bases do Réxime Local, artigos 78.2. e 78.3 do Regulamento de Organización, Funcionamento e Réxime Xurídico das Entidades Locais e artigo 210 da Lei 5/1997, de 22 de xullo, de Administración Local de Galicia, en canto aos prazos establecidos para a convocatoria e celebración do pleno extraordinario a petición dunha cuarta parte dos membros da Corporación, por Resolución da Alcaldía 946/2019, de data 4 de outubro de 2019, procédese á convocatoria de sesión extraordinaria do Pleno, a celebrar o día 11 de outubro de 2019, ás



CONCELLO DE CABANAS (A CORUÑA)

09:00 horas, no Salón de Sesións da Casa do Concello, cun único punto na Orde do Día: Moción para a adopción urxente de medidas que salven o futuro da central térmica de As Pontes.

Dita resolución foi notificada ás concelleiras e concelleiros da Corporación, en data 4 de outubro de 2019, achegando a devandita moción presentada polo Grupo Popular, procedendo así mesmo na mesma data á súa publicación no Taboleiro de Edictos e sede electrónica municipal.

Rematada a intervención da Secretaria-Interventora accidental, o Sr. Alcalde, Ladra Brage, dá a palabra á voceira do Grupo Popular, Sra. Arias Martínez.

A voceira do Grupo Municipal Popular, Sra. Arias Martínez, procede á lectura da moción presentada:

“O Grupo Municipal do Partido Popular de Cabanas, ante a fonda preocupación que sentimos en relación coas últimas noticias conocidas en torno ao peche da Central Térmica de As Pontes que requiren da adopción de medidas urxentes; ao amparo do disposto no artigo 78.2 do Real Decreto 2568/1986, de 28 de novembro, polo que se aproba o Regulamento de Organización, Funcionamento e Régime Xurídico das Entidades Locais solicita, coa sinatura preceptiva dun mínimo da cuarta parte dos concelleiros desta corporación, a convocatoria urxente dun PLENO EXTRAORDINARIO cunha Orde do Día na que se inclúe o seguinte punto:

MOCIÓN PARA A ADOPCIÓN URXENTE DE MEDIDAS QUE SALVEN O FUTURO DA CENTRAL TÉRMICA DE AS PONTES

EXPOSICIÓN DE MOTIVOS

A central térmica de As Pontes é o maior grupo de producción de enerxía de Galicia, dá emprego directo a 700 persoas e xera un impacto económico na zona de 80 millóns de euros ao ano.

Desde marzo de 2018 a instalación estaba inmersa na adaptación á Directiva de Emisións Industriais da Unión Europea, comprometendo un investimento de 217 millóns de euros para garantir unha alta eficiencia ambiental e cumplir máis aló dos requisitos desta norma comunitaria.

A Central Térmica acordou a paralización da súa actividade dende hai cinco meses e suspendeu gran parte da execución do investimento previsto, como consecuencia dunha política enerxética desordenada por parte do Goberno de España que avoga polo abandono anticipado do carbón sen dar resposta ás consecuencias en termos de actividade económica e emprego nos territorios afectados, nin en termos de garantías da subministración eléctrica a un prezo competitivo.

Esta situación xa viña sendo moi preocupante polas súas consecuencias sobre os traballadores, empresas e sectores, en xeral, vinculados a esta central, especialmente aos transportistas, que levan cinco meses sen poder traballar.

O pasado 27 de setembro, Endesa comunicaba a descontinuidade da producción das súas centrais térmicas, entre elas, a de As Pontes, é dicir, o seu próximo peche. Esta decisión ten unhas implicacións dramáticas para Galicia, en xeral, e para a comarca de Ferrolterra, Eume e Ortegal, Terra Chá e Mariña Lucense en particular.



CONCELLO DE CABANAS (A CORUÑA)

Este peche materializaría a perda de centos de empregos nestes Concellos e tería un impacto económico e social cunhas consecuencias dramáticas para estas comarcas. Non podemos tolerar esta situación nin maternos impasibles ante o desmantelamento dun sector económico que xera moita riqueza e do que viven centos das nosas familias e, por iso, debemos amosar a unidade de acción que os nosos veciños se merecen para denunciar este novo castigo e esixir inmediatamente solucións que garантan o futuro e os empregos e eviten unha nova reconversión industrial nesta zona.

É por iso que, o Grupo Municipal Popular presenta esta moción para o seu debate plenario, solicitando a adopción dos seguintes ACORDOS:

O Pleno do Concello de Cabanas amosa todo o seu apoio e solidariedade cos traballadores da Central Térmica de Endesa en As Pontes, coa industria auxiliar e cos transportistas vincellados a ela e co Porto de Ferrol, esixindo do Goberno de España a aplicación de medidas urxentes para garantir a inmediata reapertura da central de As Pontes, e no caso contrario a dimisión da Ministra de Transición Ecolóxica, Teresa Ribera, principal responsable da situación da central pontesa.”

O Sr. Alcalde, Ladra Brage, expón que desde o Goberno de Cabanas se presenta unha emenda á totalidade desta moción, que sería presentar a declaración institucional que asinaron todos os alcaldes e alcaldesas de todos os partidos políticos das comarcas de Ferrol, Eume, Ortegal, Terra Chá e a Mariña occidental, preguntando á voceira do Grupo Popular, Sra. Arias Martínez, se ten a ben aceptala.

A voceira do Grupo Popular, Sra. Arias Martínez, manifesta quen non acepta a emenda.

De seguido, o Sr., Alcalde, Ladra Brage, abre as quendas de palabra para o debate da moción presentada polo Grupo Popular.

Na deliberación do asunto prodúcense as intervencións coas opinións que se recollen a continuación:

A concelleira de AEC (Grupo Mixto), Sra. García Amor, manifesta que ante cuestións deste tipo deberíamos estar todos de acordo todos os grupos. O peche de empresas da nosa contorna é un problema que afecta a todos os que vivimos aquí e a moitos sectores, non simplemente ao empresarial en si senón tamén a auxiliares, transportistas, comercio.

Non obstante sabemos que os Alcaldes de toda a comarca, e de moi diferentes grupos políticos, entre eles o Partido Popular, xa están a actuar neste senso, no só pola central de As Pontes, senón por todas as demais que están en situacións similares; ve absurdo pedir a dimisión da ministra en funcións, que agora mesmo non toma decisión, e que en menos dun mes pode cambiar. Isto non debería ser usado politicamente, xa que non hai un só culpable desta situación. Vendo pasar diferentes gobernos foise observando o deterioro do tecido empresarial de Galicia en xeral, e da comarca en particular; ninguén foi quen de adoptar as medidas para revitalizar o emprego e buscar alternativas para que os nosos mozos non se vexan obrigados a buscar fóra o seu futuro e que a poboación no se vai envellecendo e teñamos máis pensionistas que poboación activa.

Todo isto non se vai a resolver ata que teñamos un goberno con poder decisorio e poda abordar con carácter urxente medidas para todas as empresas que se atopan nesta situación



CONCELLO DE CABANAS (A CORUÑA)

tan crítica. Desde AEC estaremos a favor sempre de mobilizacións de apoio aos traballadores da comarca a apoios conxuntos de todos os membros desta corporación, que entendemos que é como temos que actuar, en conxunto, unidos, polo ben de todos en temas tan graves como este e que afectan a moitos cidadáns.

O concelleiro de En Marea-Grupo Mixto, Sr. Pérez Sardiña, manifesta que despois de 12 anos que pechou a mina vímos con esta cuestión ao pleno. Atopámonos con que non hai propostas para resolver esta situación; estanse dando solucións do tipo de que se empregue nesa central biomasa forestal ou biocombustibles, que ao final acaban sendo un asunto ridícuo; non entendemos que estiveron a facer os poderes públicos de todos os signos, nin tampouco entendemos que están a facer as principais forzas sociais da comarca, calando diante deste tipo de propostas que non van a ningures.

Unha central que emite o 30% dos gases de efecto invernadoiro de Galicia e unha das vinte máis contaminantes de Europa, ¿poden crer calquera de vostedes que ten un longo futuro?

O seu futuro está comprometido e so saben todos os grupos políticos desde que hai unha taxa ao CO₂ e esa taxa non é rendible.

Non entendemos que estamos a facer, porque chamar á unidade cando esta unidade tiña que ser moi anterior a todo isto; vámonos a xuntar todos para pelexar por que, esa é a cuestión. O último que se pode facer é mentir por un feixe de votos.

Hai que traballar, hai que orzamentar e garantir o futuro da Comarca de Ferrolterra, Eume, Ortegal e tamén a de Cerceda, Ordes, Terra de Melide e Arzúa, porque son dúas as que están nesta situación. En principio xa hai rexións da Unión Europea afectadas pola transición enerxética, que están a demostrar, coa creación de máis emprego e de máis calidade que traballar polo futuro e traballar pola transición ecolóxica e enerxética é posible.

Hai que crear un Green New Deal en Galicia. Nesta liña entendemos que habería que poñer en marcha de inmediato un grupo de traballo para desenvolver un mapa de transición sostible de Galicia, coa participación das universidades galegas, e en segundo lugar poñer en marcha de inmediato un grupo de traballo en paralelo para desenvolver dous proxectos piloto do mencionado mapa, nas Comarcas de Ferrolterra, Eume, Ortegal e Ordes, Terras de Melide e Arzúa, baseándose en modelos xa existentes noutras rexións europeas; non sei se nos van facer caso nisto ou non, pero non hai outra saída, é o que están a facer noutras rexións de Europa e con discursos non se solucionan as cousas.

A voceira do Grupo Municipal Popular, Sra. Arias Martínez, manifesta que dende o Grupo Popular non estamos pedindo a dimisión irrevocabel da ministra, estamos pedindo que si non se procede a inmediata reapertura da central de As Pontes e se non se adoptan solucións, pedimos a dimisión, pero non é irrevocabel. Queremos a defensa dos nosos traballadores; dentro dun mes poden cambiar as cousas pero tamén poden non cambiar, e para as familias que dependen dunha economía ligada á empresa Endesa un mes pode ser moi tempo de espera.



CONCELLO DE CABANAS (A CORUÑA)

Queremos solucións o máis inmediatas posibles. Por outro lado, hai outros lugares de Europa que están dando alternativas, ou que incluso que non se están ceñindo aos prazos dun xeito tan inmediato, como é o caso de Alemania, que decidiu estendelo ata 2040, ata que se poda chegar a unha transición ecolóxica sostible e real, non sobre o papel e dun xeito electoralista.

Polo grupo BNG, o voceiro Sr. Varela Martínez, manifesta que lle parece moi lícito que o Partido Popular teña capacidade para forzar a convocatoria dun pleno monográfico para falar sobre Endesa, e parécelle surrealista que sexa precisamente o Partido Popular quen pretenda agora poñerse a careta de defensores do emprego nesta comarca, cando foron e son os gobernos do PP e do PSOE no Estado e do PP na Xunta de Galiza os culpables de que esteamos hoxe nesta situación.

No cabe dúbida de que a situación que ten Endesa sería moi diferente se Endesa fose unha empresa pública, pero como vostedes saben no o é; non é unha empresa pública por eses traballo de privatización que iniciou Felipe González e que despois culminou o Partido Popular con José María Aznar. Por iso, Sra. voceira do Partido Popular, no canto de reverter os seus beneficios nas arcas públicas e no fortalecemento industrial de Galiza, Endesa o que está a fortalecer son os seus propios beneficios. Está moi ben vir aquí hoxe a dicirnos que defenden o emprego e pedir un plan de reactivación industrial cando vostedes levan anos e anos gobernando na Xunta de Galicia, e outros anos en gobernos do Estado sen facer nada. Por iso gustaríame preguntarlle, ¿a que PP temos que crer? Ao que coloca a xente como José María Aznar, Pizarro, Cabanillas, Luis de Guindos nos Consellos de Administración das eléctricas ou ao que representa vostede que ven aquí cunha proposta moi bonita sobre o papel pero que despois ven a pedir o voto por estas mesmas persoas.

Se queren dar solución aos problemas do sector enerxético falemos de soberanía enerxética; falemos de que Galiza teña dereito a decidir sobre o seu propio modelo enerxético, que poda camiñar cara o control público do sector, decidir tamén como levar a cabo unha descarbonización que é inevitable; non pode vir aquí a decir que se manteña aberta a central das Pontes cando vostede sabe que iso non vai a poder acontecer a curto prazo, e que ademais esta descarbonización pode ser unha gran oportunidade para apostar por unha producción moito máis sostible e eficiente, e que recorte esa dependencia das materias primas para poder apostar por unha capacidade xeradora e rexistrala ao noso favor cunha tarifa eléctrica galega.

Galiza non pode consentir que despois do espolio levado a cabo por Endesa esta empresa decida cerrar a factoría da noite á mañá, sen ter artellada unha alternativa. Polo tanto o primeiro que deberían de pedir sería que a empresa falase das intencións que ten con respecto ao seu futuro e segundo constituir un grupo de traballo para a transición ecolóxica. Vir aquí a pedir a dimisión dunha ministra en funcións non nos vai amañar o problema que temos nas Pontes e en toda a comarca. Desde o BNG apostamos por un plan de choque para a crise da industria galega, que se planifique e que tamén se aposte por unha tarifa eléctrica galega con control público para todo o sector enerxético.



CONCELLO DE CABANAS (A CORUÑA)

O Sr. Alcalde, Ladra Brage, abre a segunda quenda e palabra.

O concelleiro de En Marea-Grupo Mixto, Sr. Pérez Sardiña, quere aclarar que Endesa investiu 200 millóns de euros, sabendo que existía o risco de que se o mercado do CO₂ seguía á alza, a central non sería rendible; esta é a consecuencia de por que esa precipitación agora de pechar. Hai propostas que se están facendo e que os beneficián, pero evidentemente aquí non se trata de beneficiar a unha empresa, trátase de mirar polos traballadores e traballadoras destas comarcas; os poderes públicos deberían estar centrados en buscar alternativas como algunas das que apuntei ou outras moitas. Nós si que vemos moi necesario que se resolvan problemáticas concretas a curto prazo, como é a dos camioneiros, e nesa liña se poden facer propostas concretas e hai solucións. Nós témolas e cando se pidan tamén as expoñeremos no seu momento.

A voceira do Grupo Popular, Sra. Arias Martínez, manifesta que dende o PP o que denunciamos é que este peche de Endesa e o non dar unha alternativa viable responde a medidas electoralistas por parte do Partido Socialista, nun esforzo por gañar o voto ecoloxista. Algún iluminado seguramente en algún momento fixo unha estimación de voto e decidiu que o voto ecoloxista se gañaba por aí.

A ministra de transición ecolóxica non da alternativas nin se preocupa pola zona e quere ceñirse rapidamente ás medidas impostas por Europa, en detrimento dos traballadores da zona. Efectivamente, Sr. Varela, sabemos que a descarbonización é inevitable; pedimos simplemente que se amplíen os prazos, como está facendo Alemania ata que se dea unha resposta sólida, solvente e viable ás necesidades dos traballadores da zona.

As Pontes é a segunda renda per cápita de Galicia, e as pensións más altas de toda Galicia; evidentemente isto se debe en gran parte a Endesa; sen embargo é unha zona de paro altísimo e das más castigadas; efectivamente estamos ante a cuarta reconversión industrial.

Como vostede ven di, normalmente ven sempre da man das mesmas siglas; esta cuarta reconversión industrial, unha vez máis, ven da man das siglas do PSOE, co aplauso e o beneplácito, entre outros, do seu grupo, que sempre está á sombra dos ditados do PSOE, como xa fixo no famoso bipartito, no que vostedes tampouco ofreceron ningún tipo de solucións para a zona; evidentemente, no só na Xunta de Galicia estivo o Partido Popular.

Por outra parte simplemente estamos pedindo a defensa dos nosos traballadores, xa que desde hai bastante tempo o partido socialista xa non é tan socialista, hai moito tempo que deixou de ser obreiro e ultimamente non é nin español.

Polo grupo BNG, o voceiro Sr. Varela Martínez, por alusións, manifesta que lle aleda que saque o bipartito, porque realmente foron os únicos catro anos en que Galiza avanzou un pouquín na historia da democracia; onde tivo atribucións o BNG, nese bipartito, na parte de industria, foi onde houbo un concurso eólico, que apostaba por unha alternativa enerxética para Galiza, afastándose un pouco da dependencia do carbón, que como vemos hoxe en día non tiña futuro. Polo tanto algo de visionarios si que tiñamos no BNG e ben que fixemos nese aspecto.



CONCELLO DE CABANAS (A CORUÑA)

O Sr. Alcalde, Ladra Brage, apunta pola súa parte que electoralista se pode dicir que é a súa moción, cando todos os alcaldes e alcaldesas da comarcas se xuntan e o PP se desmarca facendo unha moción que non ten nada que ver coa declaración institucional de todos os alcaldes e alcaldesas, incluídos alcaldes do seu partido; iso si que é electoralista. É unha pena que podendo aproveitar a unión de todos os alcaldes e alcaldesas da zona, algúns se desmarquen do que se fala e se leva a cabo nesa xuntanza.

A continuación a Presidencia somete a votación a moción presentada, resultando catro votos a favor dos membros do Grupo Popular, ningunha abstención e sete votos en contra dos membros do Grupos Socialista, Grupo BNG, concelleira de AEC (Grupo Mixto) e concelleiro de En Marea (Grupo Mixto), resultando rexeitada a moción.

Non tendo máis asuntos que tratar a Presidencia levanta a sesión, sendo as nove horas e vinte e dous minutos, da cal estendo a presente acta, á cal se une como Anexo a gravación sonora, do que eu, Susana Fernández Muíño, como Secretaria accidental, dou fe.

Vtº e prace.
O Alcalde

A Secretaria accidental,



[Large blue ink signature over the text]